

上清神寶洞房真諱上經

此經一名青童道君列紀 一名太保玉經 神仙修之 為上清之
真 昔魏君華存 授之許君遠遊 居西城墉臺 盟紫景十華藥玉
割星雲寶霄翔鳳之錦 以告上清 百年以傳真人 不以露文地民
發真昭之天矣

玉保王青遺道君 諱龍光玄 字幽無 生木真一氣青廈流光九

變東玉那國玄珞之山 翠華含精 流珠俠衛 九千曆周 香敷瓊葩

明落藥本 玉儀九尺 洞觀十方 天女捧衣 玉帝稽顙 吟聲朗

徹 林谷駭震 天寶神仙王 授青元上真祕籙一百五十五書 真目

周悉 化庶兆門 以啟梵運 開道之本曰

至道者 洞虛也 化本者 覺意也 天地不言 有以示也 萬

物群品 有以象也 雷風雲氣 有以感也 所以然者 以覺意得也

莫不洞虛而變化也 化者 常也 變者 名也 天地萬象皆生於

洞虛 洞虛無有也 化象覺意 皆出於洞房也 洞房 有中無也

洞虛 無中有也 房有也 物不因人也 天也 其工巧於人 不逮

見而得之意也 人以意得也 得者 取之也 天以意示人 與之也

上清神寶洞房真諱上經

清微藏書閣

所與合 則道德與元炁混一 無所不能為也 無所不可見也 生

死去來 萬類消息 在覺意中也 天地 吾父母也 無不同也 終

始有無 不出此也 隨作隨應 顯乎幾矣 幾者 上清神寶洞房真

諱也 真者 真乎此也 諱者 諱乎此也 得此者 太上仙矣

玉保道君 於時身流瓊光 照無窮盡 首建危冠 珠寶映形

披御霞彩 天地告瑞 丹芝呈芳 以真道成 退齋告於金闕帝君後

聖之真曰 大哉 深乎至矣 以發生廣施 長養化源 是為玉寶

嬰兒守雌 厚澤不形 故號青童 金闕帝君告青童曰 子體有玉骨

心有九皇 日窗高下 紫志頤下 碧睛深映 自宜位登高真 至

道祕諱 今得開曉 而一形寓於天和 亦應鍊冷 使有無合化 上

升玄宮 青童道君退齋鬱林 肘步請究 乃告之曰 子當閑居 閉

目習視 令如開目 開目閉目 不可去見以見 持之百日 夜視而

光通矣 當復收天光於玄鏡 歷念子身中有水晶 即仰看真極下

洞房中方寸三真 視百日 當聞如天震雷 方寸之中 可方丈矣

百八十日 如大屋矣 三百日 如官殿矣 千日 與天地等矣 不

以念而念 不以思而思 不以覺而覺 不以意而意 惟精所通 萬

象備矣 向之覺意所得 皆在其中矣 神道自顯 顯而昧昧 遼然
與世遠矣 洞房中當見子之造化無窮 無邊無極際也 子忽升天
安坐洞房 執經南向 黃老則哺子以神奇矣

青童道君行之千日 身佩豁落 駕鳳乘雲 以造日宮 日中赤
炁凝精 盤流千折 日根之神結玉之粹 其名鬱儀赤章龍文 青童
揖之 以採日精

洞明玉清太上之文



青童道君曰 飲日之丹 重環耀明 引吸至精 以升月中 黃
氣融廓 密採金芒 含虛養明 湛爾其神 故曰結璘黃書虎文
青童道君仰玄極之虛 通交神之曜 日月結炁 鍊冷真形 天
地納其幾 神明出其室 回盼九天 飛馳八表 金真攝炁 玉霄重
光 光通一形 內見三宮 三宮合化 二十七宮 峨峨金庭 坐列
玉嬰

上清神寶洞房真諱上經

清微藏書閣

泥丸九宮 宮各有名 下通長樓 十二玉城

中丹田有九宮

兩乳高處陷平 為守寸雙田 左有大神 名命寧 字叔平

右有大神 名正精 字子張 著紅繡衣 手執火鈴 以照四方

樓環為真人宮 中有玉清真人 名天玉 字玄通 著青雲衣 手執

玉鏡 肺為皓清宮 有素華道君 名曰成 字玉虛 著飛雲衣 坐金床

手執大珠如雞子 心為丹元宮 中有玉真 名龍精 字曦滲 著紅錦玉衣 口銜日

脾為黃室宮 中有中部玉女 名攝生 字伯昏 著紫霞衣 手執玉

尺 肝為蘭靈宮 中有木公 名長精 字孟賢 著碧霄衣 手執玉帝之

文 坐班龍之上 膽為太真宮 中有玄光童子 名彥威玉 字仙魂子 著紫雲衣 手

執劍 左腎為玉帝宮 中有玄卿君 名統真 字幽賦 著綠雲衣 手執火

玉

右腎為玉女宮 中有正真童子 名曰虛根 字正仙 著黃玉衣 合
掌坐相向

窮腸之裏為太常宮 中有高上君 名洞英 字含華 著青雲衣 手
執筴 上之九宮 神如嬰兒 坐紫雲間 治方寸中

下丹田有九宮

臍傍兩間高處陷中 為守雙田 中有二大神 左曰標元 字期七

右曰理明 字敬清 著紫繡衣 手執火炬 下燭九淵 護鎮生明

入一寸為明堂 有桃康大神 名玉威 字上明 著紅錦衣 坐金床

二寸為洞房 有玄上帝君 名無猷 字命真 著玄錦衣 手執籥

三寸為丹田宮 中為生宮大神 名務光 字勤元 著赤銖衣 手執

玉鈴

四寸為流珠宮 中有弱水大神 名積淵 字天英 著白綃衣

五寸為紫極宮 中有太乙大神 名保靈 字慶生 著單錦衣

卻上一寸為洞元宮 中有南上玉妃 名蘇 字決昌 著碧雲衣

卻上二寸為洞庭宮 中有碧元上帝 名大黃 字曾子 著黃繡衣

上清神寶洞房真諱上經

清微藏書閣

卻上三寸為洞陽宮 中有日玄大君 名鬱明 字監生 著玄錦衣

卻上四寸為洞真宮 中有帝一大神 名伯高 字都元 著朱衣 正

坐 並向外

下丹田九宮 亦各方寸 神形如嬰兒 坐黃雲中

青童道君洞見二十七真 羅布玉嬰 密為蓮房 反神無知 形

合太玄 道德來居 與天為一 祝曰

駢闕累居 玉宮九城 三官布列 丹碧羅精

周流百關 伏鍊尸形 妙有合炁 變化生明

役御大有 上飛玉清 德被群品 玉帝開顏

道備神寶 玄領真諱 俯窺三辰 坐知億年

身帶龍輿 周旋萬天 以傳金名青書玉簡 高真之人

作經一章 刻東華玉闕玄觀之上

青童玉保王道經

九開龍胎先 胎幾太無始 玉空流常無 意真寶繁會

俠日東桑霞 咽吸出紫闕 三元極元初 至德理上玄

感激但恍惚 妙覺道自然 桃康璇璣父 命精升泥丸

朱珠養雲根 天芒下入淵 真神合母精 涓涓淡流泉
默御伯玉君 晨霞起凝煙 照韞上玉公 掖致鎮容間
金曜隱芝華 太帝揖玉階 混化真常名 智惠命九還
億齡無足多 不變飛神丹 大道得長存 長存開闔間
青童道君玉經
盟禁至重 道之玄樞焉 于今偃息青林 總校上真
調御神炁 育生元元 神寶真諱 先乎天地
有知此文 身得神仙 知其寶諱 拔登祖玄
高侍帝宸 壽無窮年

上清神寶洞房真諱上經竟

天運辛卯年子月正一天師清微弟子洪鼎堅率門人

羅大英 安羅飛恭錄彙編

上清神寶洞房真諱上經

清微藏書閣